

欽


定

錢

錄

冊三

吉392  
8464  
=3




22  
23  
24  
25  
26  
27  
28  
29  
30  
31  
32  
33  
34  
35  
36  
37  
38  
39  
40  
41




錢錄卷十一



右南宋高宗建炎通寶錢靖康二年康王即位於南京改元建炎按食貨志建炎經兵鼓鑄皆廢然考本紀建炎元年九月壬辰鑄建炎通寶錢則此錢是也








右建炎通寶大錢篆書真書二體此錢蓋與前  
品同鑄本紀建炎元年九月庚戌始通當三大  
錢於淮浙荆湖諸路按高宗朝只當二及小平  
錢二種不聞別鑄此大錢意即當二本紀蓋指  
先朝大觀等舊錢後改為當三者非新鑄也



右高宗紹興元寶錢按建炎五年改元紹興本  
紀紹興元年八月壬午鑄紹興錢





右紹興大錢二體書一曰元寶一曰通寶讀各  
不同按食貨志以李植提點鑄錢公事植言今  
泉司小平錢一萬八千緡折二錢六萬六千緡




云云則前品蓋小平錢而此大錢則折二與建炎二種同也



右紹興元寶大錢與前通寶一種同皆折二也  
背有星月文如開元製








右孝宗淳熙元寶大錢按乾道十二年改元淳熙本紀淳熙元年十二月丙辰罷鐵錢改鑄銅錢食貨志孝宗隆興元年詔鑄當二小平錢如紹興初注謂乾道淳熙迄於嘉泰開禧皆如之則此錢實與紹興折二同其背文八字十字十字十二字十四字十六字則記是年所鑄蓋淳熙十六年之次年即改元紹熙也至本紀又載六年十月庚子四川行當三錢意是別鑄或

舊錢只行於蜀耳





右孝宗紹熙元寶錢小平錢也








右紹熙元寶大錢折二錢也



右寧宗慶元通寶錢背文穿上增漢字蓋鑄錢地如漢陽監是也食貨志稱併富民監於漢陽監可據




右慶元通寶大錢按此錢大於前折二諸品攷食貨志慶元三年復神泉監以所括銅器鑄當三大錢則此錢是也





右寧宗嘉泰通寶大錢按慶元七年改元嘉泰此錢蓋當三與慶元當三錢同



右寧宗嘉定通寶大錢較前品稍大按開禧四年改元嘉定本紀嘉定元年十二月庚午四川初行當五大錢食貨志嘉定元年即利州鑄當五大錢是錢蓋當五也



右嘉定通寶大錢折二錢也



右理宗大宋元寶錢按嘉定十八年理宗即位改元寶慶本紀寶慶元年秋七月乙酉詔行大宋元寶錢食貨志寶慶元年新錢以大宋元寶為文





右理宗紹定通寶大錢按寶慶四年改元紹定



此亦折二錢也



右理宗端平通寶大錢按紹定七年改元端平此錢與嘉泰當三錢同應是當三錢也理宗朝專措置楮幣而銅冶大衰攷本紀端平元年六月癸巳禁毀銅錢




右理宗嘉熙大錢二種曰通寶曰重寶按端平四年改元嘉熙食貨志嘉熙元年新錢當二并小平錢並以嘉熙通寶為文當三錢以嘉熙重寶為文今前一種蓋當二後一種則當三也



右理宗淳祐元寶大錢按嘉熙五年改元淳祐淳祐二年三月詔在外諸軍請給楮幣權以十




八界三分增給又三年命淮東西總所餉軍券  
錢並給楮四分則當時用楮仍與錢並行特楮  
賤不得以錢權之故分配支給食貨志謂之  
品搭是也





右淳祐通寶大錢背文有當百字錢質厚重過  
於諸大錢數倍而史無明文按本紀淳祐九年

三月乙酉以程元鳳為江淮等路都大提點坑  
冶鑄錢公事蓋是時所鑄又按淳祐十二年從  
監察御史劉元龍言遂令純用楮及至公私交  
弊明年仍用錢會中半則前此所云三分增給  
與給楮四分者又非定額矣賈似道當國主用  
會子亦曰交子後又變而為關子其意在於廢  
錢用楮故元龍純用楮之議顯為迎合然勢難  
久行卒不能盡廢園法也







右理宗皇宋元寶錢按淳祐十三年改元寶祐食貨志寶祐元年新錢以皇宋元寶為文



右皇宋元寶大錢二種微有大小






右理宗開慶通寶錢按寶祐七年改元開慶本紀開慶元年五月乙丑行開慶通寶錢




右理宗景定元寶錢按開慶二年改元景定王圻續通考景定元年九月詔鑄新錢以景定元寶為文







右景定元寶大錢三種



右度宗咸淳元寶大錢二種按景定六年度宗即位改元咸淳此錢背文三字七字攷咸淳七年元建國號越三年為帝熈德祐元年又一年景炎一年祥興而宋皆無復置監開鑄之事矣

臨安府行用

準參伯文省

右錢牌一面曰臨安府行用一面曰準三百文省攷元人孔行素至正雜記言南宋有錢牌長三寸有奇濶二寸今此尺度雖不同然為錢牌無疑曰省者建炎三年四月正官名合中書省



門下省尚書省為一謂之知三省此蓋三省所鑄也南宋自建都杭州升為府終南宋一百五十餘年皆稱臨安府此錢不審為何時造據此則南宋當二當三當五當百諸大錢而外又有準三百文之錢牌而志傳俱未之錄想未久即罷廢不行耳今附入於南宋諸品之末可以補舊史之所未備

錢錄卷十二




右遼太祖天贊通寶錢按遼耶律阿保機於後梁末帝貞明二年稱神冊元年至龍德二年改元天贊遼史食貨志鼓鑄之法先代撒刺的為夷離董以土產多銅始造錢幣太祖襲而用之遂致富強以開帝業







右二品篆文奇古洪志謂不知年代今按亦天贊二字特左文讀耳



右穆宗應歷重寶錢遼史穆宗本紀天祿五年九月丁卯即位改元應歷今按是歲辛亥為後周太祖廣順元年也



右景宗乾亨元寶錢按景宗保寧十一年改元乾亨是為宋太宗太平興國四年食貨志景宗以舊錢不足於用始鑄乾亨新錢錢用流布



右聖宗太平元寶錢乾亨四年聖宗即位改元統和二十九年改開泰開泰元年改元太平則宋真宗天禧五年也按食貨志聖宗鑿大安山




取劉守光所藏錢散諸五計司兼鑄太平錢新舊互用



右太平興寶錢與前元寶錢正相類曰興寶者或如石晉之天福鎮寶別為一種背文丁字疑即聖宗之太平七年歲在丁卯也洪志讀作大興平寶義未安



右興宗重熙通寶錢按宋仁宗明道元年為遼興宗景福元年次年遼改元重熙興宗本紀重熙二十二年閏七月己亥長春州置錢帛司









右道宗錢五種凡六枚大康有通寶元寶二品  
 按道宗以重熙二十四年即位改元清寧清寧  
 十年冬改明年為咸雍咸雍十年冬改明年為  
 大康大康十年冬改明年為大安大安十年冬  
 改明年為壽隆食貨志言道宗之世錢有四等  
 曰咸雍曰大康曰大安曰壽隆皆因改元易名

而不言清寧今此錢具在則清寧中蓋亦嘗鼓  
 鑄而史書軼之也




右天祚帝乾統天慶錢各一按天祚帝壽隆七  
 年即位羣臣上尊號曰天祚皇帝改元乾統乾  
 統十年改元天慶則宋徽宗政和元年也食貨  
 志天祚之世更鑄乾統天慶二等新錢






右西遼壽昌錢按李季興東北諸蕃樞要云契丹天祐年號壽昌今攷天祐帝則西遼耶律大石也據天祚帝紀百官冊立大石為帝號葛兒罕復上漢尊號曰天祐皇帝改元延慶無壽昌紀元之說豈正史失之而樞要所云或別有據歟至洪志引北遼通書曰天祚即位壽昌七年云云壽昌蓋壽隆之誤耳




右小大二品舊譜及洪志俱謂不知朝代今自右及上讀之曰感天元寶按天祐帝在位二十一年遺命皇后權國稱制號感天皇后此錢蓋其時所鑄也






右千秋萬歲錢董道曰亦遼國錢遼宋通使時其國人頗携此錢入中國




右一種穿下字曰二右文近天字左文不可識  
規制篆體類天贊錢疑亦初遼所鑄



右大千通寶錢通寶二字倒書之亦見洪志右  
文丁字與大平興寶錢同

右千字錢李孝美曰體如遼錢疑其同出今併  
附於遼代諸錢之後



右夏仁宗天盛元寶錢按夏人慶六年改元天  
盛時則南宋高宗之紹興十九年而金煬王之  
天德元年也






右金煬王正隆元寶錢按煬王天德五年改貞元貞元四年改正隆則宋紹興之二十六年也食貨志金初用遼宋舊錢天會末雖劉豫之阜昌錢亦用之至正隆二年閱四十餘歲始議鼓鑄三年中都置錢監二京北置監一三監鑄錢文曰正隆通寶輕重如宋小平錢與舊錢通用



右世宗大定通寶錢背文曰申曰酉亦紀年也正隆六年世宗即位改元大定按史大定十年令戶部流通官錢十五年諭宰臣增鑄新錢十八年代州立監鑄錢其文曰大定通寶文字肉好又勝正隆之制又二十年名代州監曰阜通又二十二年設官提控阜通監又二十三年以




節度領監事又二十七年曲陽縣鑄錢別為一  
 監以利通為名又二十八年京府及節度州增  
 置流泉務蓋金代鼓鑄惟是時最盛




右章宗泰和大錢按宋寧宗慶元七年為章宗  
 泰和元年食貨志稱泰和四年八月鑄大錢一  
 直十篆文曰泰和重寶與鈔並行此錢是也蓋  
 章宗即位罷鑄錢承安二年鑄銀名承安寶貨


一兩至十兩分五等每兩折錢二貫尋以私鑄  
 多寢不能行亦罷之至是始鑄錢計自明昌改  
 元以來凡十二年無置監鑄錢之事








錢錄卷十三



右元武宗錢二品前一品曰至大通寶楷書後  
一品曰大元通寶西番篆書按食貨志武宗至  
大三年初行錢法立資國院泉貨監以領之其  
錢曰至大通寶者一文準至大銀鈔一釐曰大




元通寶者一文準至大通寶錢一十文



右順帝至正通寶錢凡三種以次遞小前一種及最小一種背文西番篆讀作巴納蓋梵語錢

字也其第二種背文上一字亦西番篆讀作額下楷書曰二蓋當二耳按史元世交鈔寶鈔皆印造錢文無鼓鑄之事惟武宗一置監鑄錢然仁宗皇慶元年即下詔廢不行所立院監悉皆罷革而專用至元中統鈔順帝至正十年丞相脫脫始復建議開鑄置寶泉提舉司鑄至正錢與交鈔通用謂子母相權顧所鑄不能流通至其後乃並鈔亦不行所在郡縣皆以物貨相貿易公私所積之鈔人視之若廢楮蓋自錢法敝而鈔法亦壞矣






右明太祖大中通寶大錢按明會典太祖初置  
 寶源局於應天鑄大中通寶錢及平陳友諒命  
 江西行省置貨泉局頒大中通寶錢大小五等  
 錢式此其大錢也明太祖始建國號意在大中  
 既而祈天乃得大明故當時錢文有此蓋未紀  
 元以前自稱吳王時所鑄耳








右太祖洪武通寶錢五品凡六枚背文曰十曰五錢曰三錢二錢一錢按會典太祖即位令戶部及各行省鑄洪武通寶錢其制為五等當十錢重一兩當五重五錢當三當二重如其當之數小錢重一錢首二枚背文又浙字福字蓋各行省所記如唐會昌錢制也



右洪武通寶小錢按洪武四年改鑄小錢此錢背無文較前五等式小錢稍重而肉好更工緻




右成祖永樂通寶錢按會典永樂九年鑄




右仁宗洪熙通寶錢






右宣宗宣德通寶錢按會典宣德九年鑄




右英宗正統通寶錢



右英宗天順通寶錢



右憲宗成化通寶錢




右孝宗弘治通寶錢按會典弘治十六年鑄



右世宗嘉靖通寶錢按會典嘉靖六年題准鑄造嘉靖通寶錢事例七年鑄嘉靖通寶錢又差



官於河南閩廣鑄造嘉靖通寶錢三十四年題  
准雲南鑄錢事例四十四年寶源局鑄嘉靖錢  
其時所鑄錢有金背火漆鏃邊三種又按嘉靖  
三十二年令照新式鑄洪武以下紀元九號錢  
云云今攷仁宗英宗憲宗諸朝其鼓鑄事蹟悉  
別無明文然則以上洪熙正統天順成化等錢  
蓋皆嘉靖時所補鑄而景泰以出廟遂獨無錢  
文也




右穆宗隆慶通寶錢按會典隆慶四年鑄攷明  
初沿宋元之舊錢鈔互用至弘治後多用銀而  
鈔法不行惟俸錢獨支鈔如故至是時始以新  
鑄隆慶錢給京官俸云




右神宗萬曆通寶錢按會典萬曆四年命戶工  
二部准嘉靖錢式鑄萬曆通寶錢金背火漆一  
文重一錢二分五釐鏃邊一文重一錢三分又  
命十三布政司南北直隸俱開局鑄錢







右光宗泰昌通寶錢按萬曆四十八年八月丙午朔光宗即位詔以明年為泰昌元年九月乙卯朔熹宗即位詔以明年為天啟元年改萬曆四十八年八月為泰昌元年光宗之立甫閱一月此錢或熹宗即位後所鑄然是冬尚未改天啟故仍稱泰昌也



右熹宗天啟通寶錢二品小者制如泰昌錢大者背文穿上有十字旁曰一兩按是時兵部尚書王象乾請鑄當十當百當千三等大錢仿白金三品之制於是兩京皆鑄大錢後有言大錢之弊者詔南京停鑄大錢收大錢發局改鑄則此錢旋鑄旋罷固未嘗行使也







右莊烈帝崇禎通寶錢二品微有小大按是時定錢式每文重一錢每千直銀一兩南都所鑄輕薄乃定每文重八分此二錢是也



右崇禎通寶大錢背文有監字五字按莊烈帝末年勅鑄當五錢此錢蓋當五也







錢錄卷十四




右罽賓國錢前漢書罽賓國王治循鮮城去長  
安萬二千里以金銀為錢文為騎馬幕為  
人面自武帝時始通中國



右烏弋山離國錢前漢書烏弋山離國去長安  
萬二千里東與罽賓國接自玉門陽關出



南道歷鄯善而南行至烏弋山離南道極矣其錢文為人頭幕為騎馬



右安息國錢前漢書安息國王治番兜城去長安萬一千六百里東與烏弋山離國接亦以銀為錢文為王面幕為夫人面而史記大宛傳只言錢如其王面此錢為人面而幕文無形象如史記說



右大月氏國錢前漢書大月氏國王治監氏城去長安萬一千六百里民俗錢貨與安息同此錢為人面幕文如之意所謂幕為夫人面也又拾遺記三瞳國金幣效國王之面亦效王后之面又云軒渠國貨幣同





右條支國錢前漢書安息長老傳聞條支有弱水西王母亦未嘗見也自條支乘水西行可百餘日近日所出又太平寰宇記條支國市列錢貨其文為人幕為騎馬



右何國錢隋書何國都阿蜜水南數里舊是康居之地大業中遣使貢方物洪志云何國錢以銀為之不開孔文為人面背為艸木狀



右拔汗國錢隋書作鏹汗云在蔥嶺之西五百餘里古渠搜國也新唐書拔汗至天寶三年改其國號寧遠洪志曰拔汗錢以金為之無文字又一種有三旋文並不開孔今所收面無文字背為三旋文



右康國錢舊唐書康國即漢康居國也其俗生



子以明膠置掌內言掌持錢如膠之黏物而洪志引徐氏譜云以銀為錢徑九分不開孔背面皆作人面形面文側而背文正面文繞以連珠之狀今此品適合

反

右閩婆國錢面曰一文新唐書訶陵亦曰社婆曰閩婆有文字以貝多葉寫之宋史閩婆國在南海中翦銀葉為錢博易官以粟一斛二斗博金一錢今按此錢輕甚不類鑄造蓋宋史所云

翦葉為之者



右泥婆羅國錢舊唐書泥婆羅國在吐番西以銅為錢面文為人背文為馬牛不穿孔新唐書並同又洪志引西域記曰泥婆羅出赤銅




右大食國錢舊唐書大食國在波斯之西又廣州記曰生金出大食國凡諸貿易並使金錢洪



志云此錢以金為之面文作象形形制甚小


右驃國錢新唐書驃古朱波也自號突羅朱闍  
婆以金銀為錢形如半月號登伽佗亦曰足彈  
陀今所收只銀錢一種



右碎葉國錢洪志曰鑄鐵為之形如連環聖歷  
中御史封思業使西域得之按新唐書西域傳

出安西南地千里東曰熱海西有碎葉城




右天竺國錢新唐書天竺漢身毒國也或曰摩  
伽陀曰波羅門宋史波羅門僧永世自云本國  
市易銅錢圓徑如中國之制但實其中不穿貫  
洪志載天竺錢亦不穿貫面無文與此錢合



右梵字錢一洪志曰此錢銅色純赤文不可辨



太抵類屋馱吐番錢今按此錢蓋以赤銅為之與泥婆羅錢同





右梵字錢二俱不可識或曰後一種為空界是雲四字洪氏圖一為屋馱國錢一為吐番錢按屋馱即伏陀近吐番並西域境多浮屠文字吐番與唐世為昏姻故其錢背文有甲痕仿開元


也然於諸史皆無證今附入於天竺錢之後



右倭國延喜通寶錢詳見洪志按舊唐書倭國者古倭奴國也去京師萬四千里頗有文字俗敬佛法







右日本國錢四種曰和同開珍曰神功開珍曰萬年通寶曰隆平永寶皆隸書洪志引舊譜言並徑寸重五銖按新唐書言倭惡其名更號日本咸亨元年遣使來賀自云近日所出以為名或云日本乃小國為倭所并冒其號則日本即倭耳故宋祁不別為倭國傳



右日本國乾文錢宋史雍熙元年日本國僧裔然與其徒五六人泛海而至獻銅器十餘件并國圖職貢今王年代紀各一卷裔然善隸書云其國交易用銅錢文曰乾文大寶按今所收錢缺大字如洪氏圖亦隸書與前四種同







右高麗國錢三種宋史高麗一曰高句麗地產銅崇寧後始知鼓鑄有海東通寶重寶三韓通寶三種錢又按朝鮮史畧三韓馬韓辰韓弁韓也



右篆書海東通寶錢洪志有此引雞林類事云通寶錢有篆文者製作特精




右東國重寶錢董譜洪志並謂高麗所鑄

右交趾黎字錢宋會要載秘書丞朱正臣言前通判廣州時交州人貿易多携黎字錢及砂蠟錢按宋史太平興國八年黎桓自稱權交州三




使留後雍熙三年賜桓節鉞蓋黎氏據交趾最久此錢穿下黎字記所鑄也



右無文金銀錢按巴氏倭氏賓氏小月氏大秦國東沃沮阿鈎羗波斯國高昌女國于闐杜薄新羅佛尼阿耆尼屈支迦畢試覩貨邏梵衍三佛齊層檀南毗俱以金銀為錢悉無文而莫可

分別今各錄一品不敢如洪氏強為綴屬也


右無文小銀錢按新唐書投和在真蠟之南以農商自業銀作錢類榆莢此小錢倘是耶




右一品洪志有之引李孝美說此錢徑寸五分重十五銖其文真書下注云或曰是外國鑄今



錄於異域諸錢之後









1 | 2 | 3 | 4 | 5 | 6 | 7 | 8 | 9 | 10 | 11 | 12 | 13 | 14 | 15 | 16 | 17 | 18 | 19 | 20 | 21 | 22 | 23 | 24 | 25 | 26 | 27 | 28 | 29 | 30 | 31 | 32 | 33

Centimetres

# Kodak Color Control Patches

© Kodak, 2007 TM: Kodak

Blue

Cyan

Green

Yellow

Red

Magenta

White

3/Color

Black

